

## **Isiginnartitsisarfearneq pillugu Inatsisartut inatsisissaattut siunnersuut**

(Kultureqarnermut, Ilanniartitaanermut, Ilisimatusarnermut Ilageeqarnermullu Naalakkersuisoq)

### **Saqquumiussissut**

#### **Siullermeerinninneq**

Naalakkersuisut sinnerlugit matumuuna isiginnartitsisarfearneq pillugu Inatsisartut inatsisissaattut siunnersuut saqquumiutissavara.

Siunnersummi siullermik Kalaallit Nunaata Isiginnartitsisarfianik pilersitsinissaq siunniunneqarpoq. Taamaalluni Kalaallit Nunaat kiisami nammineerluni isiginnartitsisarfegalissaq. Tamanna qularnangilluinnartumik isiginnartitsisarnermut isiginnartitsiveqarnermullu nuna tamakkerlugu inuussutissarsiutigalugu namminerlu kajuminnikkut isiginnartitsisartunut aallarniutitut atussaaq. Tamatumunnga peqatigitillugu kalaallit nunaata isiginnartitsisarfia kulturikkut ileqqutoqqat pigiinnarnissaannut, erseqqissarneqarnissaannut ineriaortinnejqarnissaannullu peqataassaaq taamatullu nunami kinaassutsitsinnik ataqtigiinnitsinnillu nukitorsaaqataalluni.

Kalaallit Nunaata Isiginnartitsisarfia siunnersuut naapertorlugu illuinnaasiunngitsumik pilersissavai isiginnartitsinikkut eqqumiitsuliornerup iluani eqqumiitsuliornikkut pitsaassuseqarluartumik takutitsisarnikkut aliikkusersuisarnissaq isiginnartitsisarfiullu ingerlatsinera kalaallit kulturiannik ileqqinillu, aammattaarli nunanut tamalaanut sammisumik aallaaveqassaaq, ilutigisaanillu qanorluunniit ukiulinnut tamanut takutitseraatsit tamatigoortut isumagissallugit.

Kalaallit Nunaata isiginnartitsisarfia isiginnartitsissusiani isiginnartitsinikkut, aamma angalaarluni isiginnartitsiartortarnikkut, radiukkut tv-kkullu aallakaatisinikkut kiisalu immiussanik tuniniaanikkut isiginnartartorpassuarnut takuneqarsinnaatissavai. Isiginnartitsinerit angalalluni isiginnartitsiartortarnerni nuna tamakkerlugu takutinneqartassapput. Taamaaliornikkut siunnersummi erseqqissaatigineqarpoq kalaallit nunaata isiginnartitsisarfia aamma Kalaallit Nunaata tamarmiusup isiginnartitsisarfingissaga.

Aammattaaq siunnersuutikkut tamanut isiginnartitsisarnermik suliaqartunut Kalaallit Nunaata Isiginnartitsisarfianit pikkorissaanissaq periarfissinneqarpoq.

Siunnersuut aammattaaq imaqrpoq isiginnartitsinermik ingerlatsiviit allat nutaamik isiginiarnerannik, tamatumunnga ilanngullugit sumiiffinni ataasiakkaani eqqumiitsuliornermik suliaqarlutik isiginnartitsiviit, ilaatigut tassaasut nammineq kajuminnikkut isiginnartitsisarnerit, meeqqanut isiginnartitsisarnerit misileraallunilu isiginnartitsisarnerit. Taakkununnga atatillugu inatsisitigut aalajangerneqarpoq, Naalakkersuisut isiginnartitsinermik ingerlatsiviit allat tapiiffigisinnaagaat. Tassunga nangissutitut oqaatigineqassaaq siunnersuut Kalaallit Nunaata Isiginnartitsisarfianut immikkut pisussaaffiliinermik imaqrmat, tassalu nammineq kajuminnikkut isiginnartitsisarfinnik allanillu sumiiffinni ataasiakkaani isiginnartitsisarfinnik isiginnartitsisarfinnik ingerlatsinermik isiginnagassiornermillu iltsersuinissamik. Aalajangersakkap ilanngullugu aalajangerpaa, isiginnartitsisarfip qinnuigineqarneq aallaavigalugu aamma atuarfiit ilinniarfiillu isiginnartitsivinnik ingerlatsinermik siunnersortassagai.

Siunnersuummi qitiusup aappaa tassaavoq Kalaallit Nunaata Isiginnaartitsisarfiani isiginnaartitsisartutut ilinniartitaanermik pilersitsinissaq. Kalaallit nunaata isiginnaartitsisarfiaita isiginnaartitsisartutut ilinniartitsineq aqqutigalugu aamma isiginnaartitsisartunik ilinniartitsisoqarnissaa Naalakkersuisut pingaartippaat, taamaalilluni piginnaaneqarluartunik isiginnaartitsisartoqartuarniassamat Kalaallit Nunaanni isiginnaartitsisarnermik siuarsaasinnaasunik. Ilinniartitaanerup aappaagu aggustip ulluisa aallaqqaataanni aallartinnissaa naatsorsuutigineqarpoq ilinniarnermilu ukiunik marlunnik sivisussusilimmi ilinniartut tallimat angullugit ilinnialersinneqartarnissaat naatsorsuutigineqarpoq. Ilinniartitaanerup pitsaassusia tamanna pillugu Ilinniartitaaneq pillugu siunnersuisoqatigiinnit Naalakkersuisunit pilersinneqartunit siunnersuinikkut qularnaarneqassaaq.

Kalaallit nunaata isiginnaartitsisarfianik isiginnaartitsisartutullu ilinniartitaanermik pilersitsinerup isiginnaartitsisarfeqarnermut isiginnaartitsisarnermullu tunngasunik samminneqqilernermut pitsasumillu ineriartortsinermut naggasiutitut isigineqannginnissaa aallartitsinertulli isigineqarnissaa Naalakkersuisut pingaartippaat. Tamanna pissutigalugu Naalakkersuisut siunnersuusiornerminni Silamiut, KAISKA (Kalaallit Isiginnaartitsisartut Kattuffiat), Kalaallit Atuakkiortut taamanilu Kultureqarneq pillugu siunnersuisooqatigiisimasut qanimut suleqatigaat. Naalakkersuisut periarfissaq iluatsillugu taakku tamaasa siunnersuutip uuma piviusunngortinneqarnissaannut ikiuussimannerannik qutsavigerusuppaat.

Taamatut oqaaseqarlunga siunnersuut Inatsisartunit akuersaartumik suliassanngorlugu ingerlateqqippara.